



葉忠節公遺稿

利

16
2762
3



門 16
號 2762
卷 3

葉忠節公遺稿卷七 文類

復昭武將軍楊公啟

男芳輯錄

尊全三達勳耀千秋鞏 天子磐石之基功能壽世體
丈人地水之象德以容民儒服東遊躬習杏壇之俎豆
戈船南下手割閩海之鯨鯢封郭令於回中三軍唱凱
借寇公於江左萬里安瀾朝野仰如歲星竹帛宜稱尚
父某未諳六甲莫展一籌驚駒隙之頻移分陰是惜憾
馬齒之加長伏櫪猶鳴方顧華戶桑弧難弦秋月忽接
雲鸞玉簡如惹天香乃盥露而開緘敢望塵而叩謝慙
非揖客荷衛敬侯之先施媿許詩人辱嚴鄭公之寵賚

昭和十七年
三月十一日
購求

何德堪承藉手以璧容趨鈴閣敬謝雲情

又

域中元老天下達尊年九十而仗鉞秉麾名齊尚父壽
百歲而投桃報李謙甚武公劍倚長天秋水淬芙蓉之
鏑旗懸明月彩旄翻楊柳之風已看南下樓船直係無
諸之頸復見東歸鏡吹喧傳朱鷺之歌屈指橫海勲名
遠勝馬援銅柱快讀平閩方畧何如韓愈碑詞史冊增
光江山生色某駒隙頻移馬齒加長雖逾不惑尚未知
非秋浦潮生頗喜蓴鱸味美晚村月上徒看烏鵲飛還
媿刻葉以難成羨孤楊之獨聳何當長者俯念鰥生笑
孤矢虛懸已無天地四方之志幸瓊瑤遠賁頓開田園
三徑之荒翠織輕綃色借青鸞毳羽金泥小篆香分丹
桂天葩陳曲几而望屏山如羅星斗出雷尊而探漢藏
似飲醇醪既有緣而聞夫子之文章伊何德而勝上公
之栢杓

壽昭武將軍楊公啟

與天爲徒得中而應屹如仙掌捧日月於千秋矯若游
龍走風雲於萬里憶樓船之舊號家世梁侯收橫海之
奇勲欽遲漢將已見圓首方足共仰歲星行看彩筆青
編俱尊尚父茲當王母欲來之夕適逢汾陽乞巧之辰
鈴閣尊開看織七襄雲錦柳營月上親迎五色輜輶登
九階八座之班佇三老五更之選六軍多算萬井同春

某少未更事壯不如人愧同蒲柳之先零喜見松柏之
逾茂月高夜靜應聞笙鶴於山頭雨霽涼生定產芝苓
於閩外擬鼓申江之棹躬祝三多猥有海昌之行致稽
九頓用是撚鬚搖膝吟蟋蟀於巴箋潑墨濡毫寫岡陵
於吳練物輕一羽誠切三熏百拜上書九如是祝

又

立功不朽多壽無疆七孔針神巧應汾陽之識百齡使
相城題羅結之名而况裔出戈船一代元勳無匹近復
誕膺華袞九天御墨猶香已勒鼎鐘佇頌几杖某智窮
多算拙惜分陰蒲柳驚秋盼松筠而色動簡編度日閱
竹帛以心怡茲當上元甲子之期得逢陸地神仙之壽
欲揚國瑞愧乏家珍敢借天上之機絲織成雲母偶寫
胸中之邱壑景落屏風

復邑令史簡菴啓

譜傳周裔望重越山携琴鶴以東臨擁圖書而南面簾
垂晝永心關四境之飢寒麥秀花發時沐一天之雨露
繼家風於鄴下我令誠賢歌政績於梁州公來何晚羣
稱傳聖世傳理縣之書共羨裴君朝推獨立之號而况
龍文驥子並出高門金友玉昆對臨大邑佇俟楓宸之
特簡欣看棟莠之聯芳某樗櫟散材風塵拙宦十年作
客倍嘗行路之難萬里思家莫遂奮飛之願所幸父母
之孔邇獲沾高厚之鴻慈願見有懷調饑難喻但念昨

非今是欲稍補久闕之晨昏兼之遠客乍歸將徐理已荒
之松菊有稽晉謁方切悚惶忽蒙金玉之下頒更荷筐
篚之遠賜函詞繾綣如聆警效於雲霄珍貺殷隆尚媿
瓊瑤之投報謹銘寸抱敬璧連城刻日三熏造階九頓
伏祈丙鑒不盡寅恭

壽郡侯魯謙菴啓

生應初陽升如朝日獲雙珠於石匱曾訪仙踪易五字
於金門遂成名士若作舟楫三江資端佐之賢與爲股
肱千騎肅外臺之表蓋自漢以後產於越者必名世之
才由周而來封於魯者皆聖人之裔當五百年之時數
以八千歲爲春秋某六甲未諳一籌莫展投林倦羽畏
聞朝市之喧被德閒身愛讀循良之傳邇逢嵩誕擬祝
華封仰體冰雪之清心不以筐篚爲庭實九如三祝文
莫猶人尺幅雙卮儉不中禮伏祈鑒茹無任光榮

報汪允升納聘啓

碧月新眉漸作團圞之景黃花到眼共嘉長久之名舞
玄鶴於山頭風雲勢合考素鐘於樂府琴瑟音調爲公
子裳者此時賜百官羅者今日杯中菊酒猶分金粟之
黃頭上黃房似借楓林之紫而况碧虛如拭雁字雙飛
秋水始波鯉書疊至讀陶詩而知九月之吉操陳策而
卜五世之昌永以百年諧我二姓恭惟天才雋拔士望
高華自漢迄今龍驤以游宦卜居邑推甲族由唐而後

越國以元勳拜爵代有名賢山號齊雲秀出風塵之表
齋名愛日雅稱禮教之宗不誇三語椽之風流自尊萬
石君之家法一門七業既父子弟之相師四代五公
見蒲穀躬桓之並貴用是先生篋射產皆照乘之珠日
暖藍田種得連城之璧蓋神童衫袖本出高門則少傅
簪纓今歸世適永惟先澤之遠欣看後起之賢某蓬茅
素族章句鄙儒華胄遙遙羞檢崔盧之譜獨行踽踽漫
希秦晉之姻繫赤繩以何緣撫青氈而自哂猥蒙不棄
冰語遙傳更辱先施儷皮遠賁顧惟某之次息爰及弱
笄未嫺中饋曷澣曷否全咨師氏之言無非無儀敢曰
閨房之秀若乃靈芸鍼線神巧難摹道韞詩詞清新莫
和故但祀八蠶於苑窳徒聞七誠於班姬媿此愚蒙懼
難爲匹茲承寵命敢不拜嘉深羨有子克家良由陳太
邱之德竊慕惟賢是與遠師戴叔鸞之風覩羔雁之在
庭愧瓊瑤之莫報伏願施於孫子宜爾室家藥綻黃金
花發羅家之菊堦浮白玉庭開謝氏之蘭中春翠於雀
屏皆成錦繡搏秋風於萬里直上雲霄將見白鴈書來
早列題名之塢紅綾餅賜如嘗食祿之饒源深者流長
汪汪千頃根榮者枝茂葉葉三珠豈直兩家門戶之輝
遂衍百祀詩書之澤姻盟若此欣幸何如

候江南學使李維饒學士啟

天上文章舊侍紫薇之座人間武庫新爲絳帳之師百

年之計樹人在取之精而儲之豫九方之識相馬必略其貌而鑒其神當觀文成化之時膺守先待後之任西清望重南斗輝流恭惟人門並高才識兩茂根蟠隴右扶疎自帶仙風家住文江曲折皆成吉宇羅鄴侯之緡帙於書無所不窺懸孝廟之珠簾此樓固應重建庚子而開甲子之文運冰鑑當空庚戌而續壬戌之科名薪傳無盡蓋儒者文章報國分宜以人事君而天子聖賢爲心不暇爲官擇地特咨岳牧精簡學臣僉舉名公克當上意掬鳳皇之池水灑化雨於東南抽袞鉞之霜毫第諸生之甲乙將來入歐陽之選者定有奇才而及司馬之門者必多實學兩江何幸親炙百世之師三歲及瓜佇擢中台之席道風遠暢士習丕新某質凡才下足蹇途遙一麾去承明之廬十載伴曹郎之署浮沉中外愧無尺寸之長周歷邊陲謬博公明之薦然而阨於數奇長爲俗吏今復裹糧遠適踏京洛之軟塵隨牒候銓望山雲於子舍有懷莫吐何面向人伏祈回憶舊遊曲賜青盼雖分淺晤稀無緣得御而春明花發不言成谿倘獲一奉德音敢不力圖報塞謹啓

又

文與福齊位以人重詩兼供奉之美具有其才文如永叔之雄不因乎地今帝心之簡在真道統之君宗朝寄固深士望攸屬某半世吳蒙兩遊秦土想鍾河岳之

氣綽有奇文曾爲帝王之都尚存餘韻然而不經法眼
連城之血淚空彈就鑄洪爐干將之光芒勃發

代新庶常請掌院宋公啓

宴錫朱櫻內廐給翔麟之馬湯溫翠釜闔門賡調鼎之
詩考月令而均琴瑟樂其有節順天行以居臺榭高而
不危在卦曰離際文明之期事資贊俊於時爲夏躬爨
理之任道在扶陽瞻喬木之陰濃已定百年之計幸新
進之連茹豈惟多士之光藻榜珠聯玉堂簪盍恭惟道
成人已鉉節剛柔賦裏梅花自挾冰霜之氣燈前竹簡
猶餘翰墨之香忠愛視房公讓功名而不有勲猷似潞
國處富貴而若無蓋三公惟其人而大臣必以道彼後
世誇救時之相望逐才輕惟我公當坐論之尊位以人
重仰巖巖之象如景泰山窺休休之心若觀滄海憶昔
公車待詔東廊繙甲乙之書迨後 天子臨雍北面決
異同之論以故金門詞賦奇字皆丹至今石鼓蟲魚古
痕猶綠而况曾司九府陋不知錢穀之陳平舊總三臺
儼數言得失之貢禹翱翔四部出入兩朝繹不求溫飽
之言榮名素澹詠無地樓臺之句神骨都清不知身爲
臯夔而獨心乎堯舜用是少翁早達終傳韋氏之經雛
鳳先飛克振謝家之羽屈指域中之三達維我斗南之
一人某等章句小儒單寒後進學慚寡陋不知遷固云
何智束觚稜妄解孔顏如許濫與木天之選幸聯玉筍

之班倍瀛洲學士之員俱遊執苑半尼山弟子之數同
侍聖門譬之百穀蕃生成資蔗葦五金在冶有待鎔錘
敢承函丈以誠祈跂俟高軒之戾止伏願烝我髦士錫
之山川益高吐握之風得人則治旋膺劍履之賜贊拜
不名將見人主用人皆出允文之材館相門有相依然
仲寶之傳家若鄭公之在貞觀凌烟待畫如涑水之當
元祐汗簡流芳黃髮在庭慶明良者有一乃心之頌丹
葵在抱勒鼎彝者垂三不朽之名矣

壽張靖逆將軍啓

春爲太皞虞淵開若木之華西有長庚开土駐鬱蓮之
景潞公八十二而再相久則徵羅結一百七而賜歸仁
者壽況乎書傳濟北從赤松以何難抑且地近崑崙望
瑤池而不遠斗星燦若輝流八陣之圖仙骨珊珊節按
五禽之戲六軍多算萬里同春恭惟尊全三達頌叶九
如鞏 天子磐石之基功能壽世體丈人地水之象德
以容民爾公爾侯茅土之分親盟帶礪多福多壽星月
之下遙見輜輶豈必老子青牛詭是東來之氣竊幸將
軍鐵馬真杼西顧之憂以是朝野仰如歲星竹帛稱爲
尚父茲當蘭契適值椿齡羽扇綸巾對茂林修竹之勝
酖顏鶴鬢爲流觴曲水之娛固知塞外桃花定由仙種
亦聞軍中樂譜不異靈鈞將吏視子孫分朋獻酒番彝
雜童叟羅拜躋堂本是謫仙何須辟穀不煩換骨自足

葉忠貞公遺稿卷十
長生超九階八座之班竚三老五更之選某少未更事
壯不如人血耗芸編漸作二毛之騎省肉銷冰署羞稱
五鼎之中郎繼早達以奚裨冀晚成而誰恃青燈顧影
真同蒲柳先零玉帳瞻光喜見柏松逾茂蓋紫胞駢脅
生不尋常故綠鬢方瞳壽何紀極况皤皤元老為朝廷
千萬里之金湯則蹇蹇世臣即廟堂數百年之喬木自
知才少難歌黃竹於黃臺實感恩深敢瀝丹心於丹鼎
伏冀三城再築萬戶重封手把玉鳩歷數太平之歲月
世藏金券永貽餘慶於蘭蓀將見史贊虎臣立功而兼
立德身圖麟閣書姓則不書名遙分莖露之杯近笑相
如中涓親捧冰桃之核遠羞方朔三偷貴壽安有窮期
榮名於以不朽矣

又

與天為徒得中而應屹如仙掌捧日月於千秋矯若游
龍走風雲於萬里韋懷文之督戰六尺板輿劉武威之
辟兵一丸螢火蓋自來兵法實始陰符故從古將家多
傳真訣內視返聽少伯所以成功辟穀採芝子房因而
得道在昔竊窺緗帙千古美談乃今親見景星八荒壽
域福田本瘠慧業多荒藥無松柏之脂未諳鍊氣生非
鼓角之相難覓封侯幸到西涼獲瞻南極月高夜靜時
聞笙鶴於山頭雨過春和常產芝苓于闐外開營列戟
森然上將之壇看劍引杯邈若神仙之府會見日邊使

者乘車頌几杖之恩忝爲門下諸生操筆上岡陵之頌
物輕一羽誠切三熏百拜上書九如是祝

侯田學使啟

士望君宗文家正鵠泰山五岳之長無得而踰渤海百
川之歸故成其大樓名萬卷家藏節度之書口授一經
世寶子莊之易竝薪傳於齊魯待人而行瞻砥柱於歐
韓非公奚屬綸扉判事五花生五色之箋粉署持籌九
賦準九州之貢迨後兩遷起部手是指南憶曾分校鑠
闡目能空北負盛名而矜絕唱居然題柱仙卽抽敏筆
以運靈思不數制銘才子於是資超選格簡自帝心爰
顧南雲實居東壁星值斗牛之分珠緯經天水涵江海

之流文瀾湧地然範五金以成器功藉洪爐求大木以
爲宮事需匠石幸逢三代之盛親炙百世之師出王仲
寶之中箱分曹隸事授袁德章以塵尾豎義驚人注史
釋經一洗六朝之香艷登歌讀法獨修兩序之威儀遂
使紀換星雲人坐春風而不覺亦遂蹊成桃李物沾化
雨以無言舉二曜以闡幽容光必照張四維而坊俗至
德可師宜乎麟鳳之來遊會見夔龍之畢集某才拙操
觚識窮相士漫說齊年文學何敢望回雖叨同拜班資
故應推沈况先生官以人重觸目琳琅乃不肖事與心
違委軀灌莽閱其貌則鳩形鵠面窵哉名士風流聆其
言則信語蛙鳴邈矣高文典冊徒使白頭博士長飡紫

塞之風可憐絳帳諸生誰是青雲之器言之於邑對此
茫然惟願以人事君薦賢受賞使東箭南金之美盡上
公車西征北伐之章並宣史館將見朱衣捧日文章列
帝座之傍黃閣延賓宰相佩通侯之印文明至此榮幸
何如

復榆林李總戎啓

運當聚斗位已登壇飛將軍之名無雙漢世真宰相之
器獨步唐朝出自將門繼西平而靖亂良由人傑與汾
陽以齊驅王者好生生故推轂於闕外天子善將將爰錫
命於師中用是手握牙璋言辭楓陛身先鐵騎馬駐榆
林大劍長鎗獨竄北門之鎖鑰輕裘緩帶屹爲東夏之
金湯行見龜鈕貂蟬赫奕公侯之府亦且虎頭燕領丹
青臺閣之圖邊堠無烟天顏有喜某力怯彎弧智疎借
箸讀書記名姓耳奚以文爲聞輦思將帥焉未嘗學也
因銜簡命以衡文偶憇征驂於彰武未能投筆縱觀
七萃之師先辱賜書兼荷百朋之錫徒滋愧汗唯有銘
心聞韓經略之名自能色喜眺徐光祿之塞徒切神馳

復延安周叅戎啓

筮叶占熊詩稱矯虎甲兵數萬藏范老子之胷中功級
五千立馮將軍之樹下在昔閭門春綠曾開細柳之營
於今塞堠烽青雅賦采薇之什心蘓七校鷹隼騫雲坐
築三城麒麟待畫允矣金城之老將宜乎玉塞之通侯

其力不勝雖學漸窺豹毛雖久禿難誇筆掃千軍竹箭
將枯敢說射穿七札茲者秋開文陣欲看全勝於關中
因之暑駕征車試演偏師於紙上乃稍遲脂轄未參君
子之軍而猥辱投醪豫飫先生之譔謹飲醇而飽德旋
贈縞而定交

壽李少叅啓

仙骨姍然詩名籍甚轉輸同於蕭相功在全秦鈞石定
於張蒼壽宜百歲誕逢仲夏見半夏之初生渴想三秋
值千秋而遙祝慶茲鼎富之歲敢忘觴祝之情某未遇
時來不知老至竊幸班荆之投贈得同采石之仙舟間
值嵩辰禮須華祝乃因操觚之未竟致稱觥之不遑伏
冀鑒原曷勝忭舞

賀杭撫軍啓

三載考績夔龍光協帝之廷六謁著官雲鳥紀昭陽之
瑞詢事言於政府建官惟賢拜車服於天朝知人則哲
五百年而生名世重看分陝之勲廿四載而位通侯共
羨從龍之佐久爲帝心之簡在新膺寵命之洊加臺
閣生風吏民色喜恭惟功高二華德曜三台建節鉞於
荒時分祿賜恨西京之烽燧夜算軍需睇中宅以傷心
顧四郊而動色籌邊樓上常懸李相之圖喜雨亭中爰
讀蘓公之記以故烟銷塞上望終南之佳氣復入樓臺

人滿關中瞻渭北之晴光重歸草木功名既醉慶賀斯
行益三百六屬常叅官無如京兆故二十四考中書令
獨有汾陽辟李固於荊州天下第一推黃香於江夏國
士無雙猗與元老之壯猷展矣 聖朝之殊寵某十載
郎官兩逢京察稽虞典三考之法罔辨幽明讀周官分
職之文未知董正所幸版曹畫省偶蒙嘉士之品題竊
愧玉尺冰壺恐負作人之雅化然而身依蓮幕三年時
坐春風則是籍著槐庭片善總歸月旦望栽培之不淺
感高厚以何窮伏冀坐論南牙銘功西極列棘掌外朝
之法義取赤心宣麻押內殿之班名垂青簡不特三秦
屬吏爭誇桃李門生行見四海蒸黎胥頌太平宰相矣

賀杭撫軍中秋啟

心映冰壺量涵銀漢智珠在握似三五之皆圓朗月入
懷爰妍媸之畢照旂翻鈴閣風清如水之門秋到烏臺
節勁凌霜之樹屹作中朝柱石紫入楓宸全銷塞上烽
烟青歸栢署茲者九秋方半天風吹桂子之香一鏡新
圓仙子按霓裳之曲金莖露湛玉杵丹成秦嶺雲開漢
江波靜行上千秋之鑑佇看九命之榮某照之藜燈識
非月旦攬餘輝於東壁難搜秦漢雄文校多士於西京
敢說歐韓虎榜惟是不欺暮夜顧公以生明而尤仰藉
容光使圓而不缺瞻庾樓於天半伴魚素以秋毫

上徐立齋學士啟

竊聞天下星雲爛然青漢而景慶則稀人間鸞鷲近在丹山而飛鳴不易故名世運符五百惟聖主夢賚一人恭惟苞靈挺秀體方用圓貞松無枝高雲獨往際乾德之昭昭叶良明之穆穆地侔乎人名允其實躬茲隆遇不已休與然而六相之職職以六事五正之官官以五行析為羣司祇靖乃位揆之大德何所不該今閣下以第一流之才品綜三百年之是非羅七畧四部之英酌六書十志之體先食貨則朝會可省謹薄蝕則天官必書經表紀於中天緯志傳於列服將使彪固悔其踈拙蔡范慙其艱難以之方駕一百三十篇彙括六萬四千卷不亦照朗春華實同秋實哉極盛難名有懷斯吐竊念某才謝敬通而遭逢不偶性非孝綽而忤物已多一麾去承明之廬十載作主書之吏聲塵寂寞貧病淹纏茲者周旋河嶽之間不覺山川之助特以其中人士猶被餘芬故到處絃歌尚多逸響某比年所得之佳士皆閣下昔日所鑄之顏淵也仰藉教思獲申緒論

上李容齋學士啟

竊聞龍馬之文不爭蟲篆離微之韻薄為繁音故川岳出雲御景風而爛熳岡阿挺榦滋華露而菁葱良由材以遇弘位因人重也閣下秀竚孤霞神流遠漢高八俊之目享六絕之名揮煖玉於風雲回豐貂於閭闔明明穆穆 聖主良臣郁郁洋洋鴻燮麗藻緯曜於焉澄霽

典冊所以流芬豈如當世不識東家將使千秋仰為南
斗昨歲遇槐里之令得蘭亭之書雲動烟霏珠聯璧合
不羨五雲於韋陟如留三素於羊權報謝之章想經垂
覽其不識不知無才無命未煖木天之席爰趨建禮之
門薄有詩歌放言落紙慙無文筆韜牘寢毫猥積數載
之勞資濫膺全秦之教鐸將謂兩生故在餘燼可噓乃
自受事以迄今茲涉大河而周列郡搜窮陸海絕少三
珠剝破藍田曾無片玉而且輪蹄險遠人遊虎豹之群
土俗悲涼士戴鵠鳩之面攢心如藥咽淚飢風行萬里
以多岐懷百憂而誰訴雖取舍之際精鑒殊難而衾影
之間初心不改謹呈試牘請政大方伏祈公餘省覽不
靳齒芬倘一字可褒將三秦生色

答張蓉城啟

竊聞辛壬癸甲啓生不用桑蓬南北東西孔轍徒勞脂
秣以故栖栖屑屑不知歲月之遷流踽踽涼涼常感親
朋之聚散而况初秋苑柳未霜至而先零閏月黃楊得
日多而偏短方嗟遲暮忽貴瑤華實感殷勤敢抒丹臆
恭惟樂山靜壽應地安貞性只耽書不剪蓬蒿之徑人
皆載酒每盈松菊之廬少年歌板彈絲羣羨周郎一顧
老去韋編著艸時聞邵子孤吟冷眼看人不着雌黃之
色霜髭吮筆猶生金翠之香回思高屐風流居然十年
以長之輩今想纏鬚姿制豈似六旬以外之人以故王

鏡臺前不受老奴之詬烏衣巷裏喧傳小鳳之名身雖
翠壁丹堦詩則白雲黃鶴斯為真樂可卜長生某少無
規檢長更癡頑方朔常飢為乏偷桃之技相如病渴因
無取酒之資幸學易之有年愧工詩之何日但瞻箕斗
常簸糠粃雖有稻粱不為雀鼠然而孤鴻嘹唳長空僅
飽霜風瘦鶴伶俜月下自梳翎雪今猶未是安知前此
之非去者苦多始覺將來之少而且衰顏蒼髮相識者
翻為異縣之兒童華袞霞觴遙祝者偏是故鄉之親串
讀高文而色喜謂是知心對庭實而顏頰得非傷惠輝
煌金幣幾經追琢纂組之功旖旎情文一洗簞路藍縷
之陋物來千重貺等百朋

壽某總漕啟

南登孔望舊是聖人之遊西訪崆峒真有神仙之府蓋
寰區靈秀稟諸天者鍾之人民力普存產於地者歸之
國萬里仰東南之蓄千倉資三九之餘穀乃民天仁能
壽世恭惟兩朝元老當代達尊吳郡桑麻舊沐中丞之
雨南中杭稻仍漕計相之舟借仙掌以持籌已勝漢唐
心計鑿龍門而輓粟何如汶濟安流惟大臣視國猶家
故兆姓望公如歲茲者日在婺女序屬嘉平維嶽生申
恰遇玉侯之臘吾若夢說倚為舟楫之臣湛然冰雪心
胸豈徒似水蔚矣松筠節操真可凌霜百歲張蒼功存
釣石九旬向朗志在詩書蓋名世之生也必五百年而

大椿之壽也以八千歲某六甲未諳一籌莫展虛糜升
斗不知歲月之遷流忙閱居諸但覺風塵之鞅掌每見
八騶鄧禹廿四封侯自憐一命楊雄十年執戟幸託喬
松之蔭小草爭榮雖逢集霰之時寒梅獨發銘恩入骨
頌德無文伏願上公九命君子萬年虞階賡拜沛如繼
壑之魚周曆干支多於在庾之粟將見庭前蘭玉盡是
雲初鼎裏鹽梅皆成瓊液佩十還九轉之丹佇三老五
更之選猗歟盛德何可名言

又

恭惟如松寒勁似菊晚香吳越楚黔四國棠陰萬里屏
藩節鉞九州鴻績千秋回思入洛之年才華誰匹今紹
有邵之職名位何其月在旗蒙律中大呂陽生日至之
時繡線添長星回春到之時珠躔乍轉考亭小學此歲
成編羅結高城將來待築况乎海甸已鄰蓬島淮濱亦
有桃源躬播穀之官何須辟穀具太羹之味乃可和羹
萬寶冬藏八荒壽域某幼而未學壯不如人方朔常飢
爲乏偷桃之技馮唐易老因無乞火之人所幸南極一
星普照渚宮之夜楚江八部皆分淮水之清粒我蒸民
見倉箱之盈止介茲景福如金石之彌堅畱此不朽之
勲名常享太平之歲月

答四川姚撫軍啓

恭惟台曜經天文波浴日魯臺山上獨開藝苑之先

部星中兩見使車之至采遺編於東壁不讀秦漢以後
之書判公案於南山每薄申韓所行之法蓋仁恕誠由
天性而才資已簡帝心用是曉直黃扉濡毫駁奏夕
居青瑣假寐憂時對仗讀彈文共羨朝陽之鳳避人焚
諫草獨吟左掖之詩三遷而獨坐南臺一舉而建牙西
蜀遙想令公戾止看成都萬戶皆舊時竹馬兒童因知耆
老歡迎見節度雙旌即向日甘棠父母招流離於兵燹
之後襁負來歸闢土田於荆棘之餘井疆漸正每懷清
獻常遊清白之江有慕文翁大啟文明之殿海棠樓下
花木常春廣莫庭前江山生色固知老成開濟五百年
定有其人密勿調元廿四考更誰可匹某才下質凡時
屯宦拙後大科之兩歲偶獲一官從先生者三年如遊
萬頃今來珂里濫筦漕司惟瞻天上之斗箕不作倉中
之雀鼠况庇仁人之宇雖幸寧居已披君子之風尤思
親炙乃錦官黃鵠千里而遙白鴈文鱗經年不度悵瞻
依之徒切愧候問之未遑何意九天忽霏珠玉兼承別
札遠錫瓊瑤深知不却為恭轉復傷廉是懼肅詞藉璧
鏤骨銜恩

候江蘇藩臺宋牧仲啟

恭惟希世逸才出塵仙吏石渠經義仍由宰相家傳洛
苑詩詞獨讓臺郎妙選禮風嫺於文雅名久擅於梁園
固宜簪筆承明身侍玉皇之香案何乃分藩閭闔手提

太府之銀章良以材無不宜自覺官皆可任况乎山塘
簫鼓堪填柳七之詞鄧尉梅花可續廣平之賦借牙籤
於鄴架便可持籌效煨法於嵇公何難鑄幣誰云王令
只擅風流應笑陳平不知錢穀小試才人之經濟佇司
天子之絲綸豈植階榮實欣道長某濫叨升斗但簸
糠粃舊為不學之吳蒙今作無情之楚舞湘潭雙淚只
弔靈均越客孤吟可憐莊舄回憶旗亭貫酒示我齊天
樂府曾許知音更思旅舍鈔書借君花草粹編猶能鬧
誦何期風雨晦明之友皆為東西南北之人不見十年
相通一夢雖中書行省近在父母之邦乃郎官故湖遠
若仙凡之隔而且終朝抱甕江上誰人近日亡猿漢陽

無樹網鯨而鯢盡摘而蔓歸當所稔聞諒為心惻也

葉忠節公遺稿卷七

男芳輯錄

次滁州贈驛傳道金長真

去年剖竹別京塵芍藥紅開兩度春
一自羽書勞廟算直將魚契付才人
麥岐翠接江湖潤草色青隨馬足新
道左忽逢如有約舊遊文采得重親

酬方念博昆仲四首

而翁而祖舊南牙六代風流譽望賒
富貴家園銷貝錦賤貧文字尚籠紗
手中塵拂桓公玉筆下詩開江令花
莫歎客途岑寂甚相逢孔李盡通家

夢回忽忽幾曾醒今夕何緣聚德星
對月莫愁銀箭盡

開筵忍令羽觴停嚴城獨夜蠻烟黑急雨空江野火青
讀罷長歌拚一醉不須掩淚說新亭

漫說當年侍從臣簿書銷歇上林春病携本草供高枕
秋憶鱸魚待釣綸醉乏郎中桑落酒賦成公子洛川神
君家舊有孫弘閣何事栖栖遠問津

蕉影蘭香蔭綠榕喜緣大鳳識雙龍欲焚佛骨心原壯
一上雞壇興轉濃輝映萼樓花韡韡神清秋水夜溶溶
獨慚絕唱真難和擬向高齋日過從

飲虔州醉顧輿山暖雪亭四首

江湖蕭瑟共萍踪吾黨風流仰顧雍曲檻似移家裏屋
層樓欲奪郡前峰談深酒力消涼雨夜靜山光隱埃烽
十載宦遊難此夕兵戈幾得故人逢

虔州高會擬河梁不學齋宮周太常步輦告身謁者監
臚傳府帖羽林郎凝光夏屋焚山麓薤露新聲出妓堂
都入長康聞見錄日鈔一紙貯奚囊

宮定菴庶常改授御史寄示二首

侍從新恩拜裏行六階人望繡衣迎文章舊自兼忠愛
風采今看動聖明民力已窮猶轉餉中原何日可銷
兵需君早定安危計莫但空言吾輩輕

惆悵空梁月影遲別來風雨共相思解頤詩記連牀夜
痛哭書成未遇時報國好憑駉馬使傳經何必鳳皇池
朝回莫便焚餘草好寄東軒慰所思

詠史五首

羽葆桐珪上將壇至尊推轂出長安令懸朱邸春雷動
劍擬諸侯夏日寒人醉蒲萄飛輓急馬甘苜蓿過江難
荆門天險真堪恃壁壘千尋仰面看

特牲告廟誓兜鍪萬騎從王度隴頭政府尚思開蜀道
邊書又報失梁州欲分處仲無君謗故遣鐫羗就父謀
兩將可憐膏野草殺間白骨有誰收

花門別部騎如雲飲馬西湖落日曛綠酒自澆蘓小墓
青碑却碎鄂王墳千村燕壘荒林見八月潮聲午夢聞
天使無諸真授首酬功可及李將軍

中原財賦大江通特借賢王坐鎮功遂有蛾眉陪曲宴
可憐猿臂怯雕弓田荒吏酷三丁盡賊去兵來萬室空
牢落新亭杯酒後更誰揮淚說江東

飛猿嶺上夜鳴笳野哭江村淚掩沙八口賊中猶望活
全城兵到已無家平臺寶玉門成市明月歌鐘女簇花
便復豫章歸板籍不知何地種桑麻

度城東偏有八境臺臺有蘇文忠公八咏余意臺
不足傳以詩傳也及奉命司權獲登斯臺雖
輪奐巍然而題咏不可復問因錄郡誌所載原

唱勒之片石并和八章後之觀者知臺以文忠
八咏而傳非余好事謬附古人也
江流依舊遠層樓戎馬誰分南顧憂憑弔更憐蘇學士

難將詩酒博封侯
千山雲樹送春還
風起江樓作暮寒
獨坐漫生今昔感
推窗極北望長安
齧城春水浪花堆
遠浦漁舟艤不開
只有上流笳鼓急
帆懸明月過江來
波光嶺樹望中明
對酒難誇吾獨醒
皂蓋不來樓寂寞
聯拳鷺立自亭亭
此間何地可安禪
極目千村思悄然
樓上春光樓下少
傷心應在繪圖先
霧氣晨收草樹中
四山無雨亦濛濛
何因二水爭歸北
不似長江只向東
晴沙曲曲抱高臺
面面踈櫺鏡裏開
只此幸存宜眺望
鬱孤遺跡已蒿萊
樓頭顏額字參差
名士風流總未知
畱取寒山一片石
從人細讀長公詩

雙瓜燈

丙辰秋七月余客虔州時差期已滿會粵東告
變廬陵失守歸路中梗羈栖官舍者四閱月矣
風鶴頻驚夢斷園城之柝家山在望眼穿子舍
之雲胸結千愁閒無一事是夕余僕剝瓜作燈
鏤以詩畫懸之亦蘇堂柱上頗為可觀因戲占

一律

及瓜猶未代幾望乃重華獨拔嫌疑地雙懸詩畫家熱
中心欲碎繫我食還賒寶炬何為者青門舊種瓜

雙江秋月行

雙江秋寒潭空翠輕烟流雙江月從人所見自圓缺雙
江今夜秋月明霓裳無聲戰鼓鳴月亦如人遇離亂陣
雲圍老姮城潮州鱷魚南海鯨張口爭欲吞天星天
星散落夜飛雪城南山下光熒熒十八危灘水波惡古
渡無船水亦涸月光半歛慘不舒似畏灘頭風浪作我
思此月懸帝鄉未央宮殿流輝光君王深坐應歎息南
征將士侵風霜風霜瘴癘遠相惜思婦樓頭眠未得空
庭水浸禱衣砧却似江干望夫石此時明月亦暫圓人
淚啼春雨驚魂溯曉風此身歸未得搖落亂離中

壽沈業師五十初度二首

曲中郢雪嘆知希便着羊裘上釣磯自著萬三千字序
原無四十九年非絳帷算歷慙高第冰署挑燈羨少微
莫訝休文消瘦甚從來仙骨不勝衣

學易忘機卧薜蘿長貧端不羨鳴珂河汾處士文中子
洛下先生安樂窩舊日詩篇誇積玉近來書法換籠鵝
天涯戎馬猶如此歸去名山業正多

雨中邀佟儼若同沈業師看君子堂顧見山壁畫
後登樓小酌儼若有詩次韵四首

日日含悽對翠屏客過尊酒話飄零家園夢到愁銷骨

人吏稀來雀滿庭十月圍城多眼白一窗苦雨共燈青
無端清角吹寒夜又逐霜風度曲櫺

兩年華髮換西州自笑真同漆室憂未必有才真欲殺
何如將老便歸休人逢多難詩逾瘦署比空山雨更幽
與爾憑高瞻眺後可曾作賦擬登樓

君子堂成人化猿虎頭墨蹟照東軒怪來官構無餘地
看罷關心為故園烏鵲夜飛三匝倦魚蝦市貴一溪喧
爭如十畝方塘畔高卧長吟著法言

珠歌翠舞席兼珍談笑還輸吾輩真瘴嶺尋山無片石
旗亭畫壁只三人長卿貲進偏工賦東老酣餘不厭貧
把酒與君商去住兵戈滿地惜逡巡

虔州雜詩

佳節重園裏銜杯涕泗橫軍聲思北府歸路斷西京戰
伐乾坤小流移骨月輕還聞二千石間架稅孤城
城騎東西合軍心草木愁輕肥堪大將功級恥通侯墟
落爭投足衣糧責賣牛遺民復何意簫鼓賽龍舟
壁壘真生色新懸帥字旗先聲唾早計持重在多疑外
府需錢易中軍刻印遲緣知趙充國方略未全宜
乘驄趨幕府推轂下江津重鎮矜新拜微詞避舊人粽
憐無益智湯幸有茵陳得婦兵戈裏相看愛子親
龍驤南下日豕使後車隨氣奪無諸壘功輕新息碑千
山聞杜宇一舸載蛾眉共訝班師早不知勝負誰

落落南征將逢人色慘然吏偷裴度印糧逐呂嘉船卷
石封庾嶺懸軍守甕天回看灘水隔跼跼墮飛鳶
信布稱兵日番君忠愛多恩光浮綠瓦誓血指黃河亦
欲爲天子居然作尉佗羽林驚象戰移帳失干戈
孫恩圖竊據嶺暗百蠻氛遂有長生號都憑娘子軍番
黎騎白象旗鼓屬紅裙汝父今如在焉知不負君
將略徒知己風雲善屈伸全師真得計能走即忠臣河
上堪持狄山中可避秦空城羅雀鼠慚愧說張巡
四面烽烟逼孤城一綫懸未聞求劍術但解括商錢白
著爭皮骨黃巾任歲年軍中誇大將自筦度支權
太守身殉國纍纍志不移獨揮孤子淚何忍上官知雅
好垂黃綬虛文笑墨衰書生不曉事腸斷補亡詩
戰馬悲鳴去偏轅夜遯寒雕弓羞月上鎖甲共花殘有
恨提袍鼓無聊把釣竿重尋食炙口甃勉乞盤餐
意氣今朝盡居然歎數奇依人看色笑含淚拜偏裨一
青應憐汝孤軍又屬誰莫嫌江路斷聞詔且需時
節鉞從天下孤城化日舒欲湔曹沫恥俱上李陵書堠
火消寒雪挑符厭故廬橫行諸將吏對此意何如
白下江頭路重圍風鶴驚多憑李常侍直取蔡州城殺
氣堙川谷軍聲別姓名可知飛將少今古不常生
膽畧大於身漁陽拜後塵兩城無立艸千里有行人神
速先驃騎風流愛角巾論功休樹下儒雅意恂恂

八部螺山戍圍城隔大江飛濤橫畫艦燎火照軍幢未
戰皆輕敵相持似受降鳴笳催月上兒女話船牕
梁王堅壁壘飛炬挾風雷賊騎銜枚入中軍踏雪回霓
旌橫野草玉帳付寒灰只有孫臏智收兵戰勝來
軍書馳晝夜徵調徧多方回紇黃沙箭良家袴褶裝幾
曾當戰陣日與送衣糧步擔者誰子衝泥淚萬行
白鷺洲前望書生意不平九重空帑藏一戰惜身名師
老輕民命田荒藉寇兵依然春殿上唯諾是公卿

却寄佟儼若四首

十載爲郎老大回將迎巧宦愧無才獨憐同調天涯別
一舸悽然帶雨開

送別新詩續渭城桃花潭水故人情石尤偏是春風急
似解離愁柅遠行

青帘紅杏故園春歸去來今少戰塵他日草堂頻寄草
今年人日和詩人
侵霜倚劍戰場過顧盼誰爲馬伏波君若趨庭勞問訊
文成曾此誓山河

寄懷佟儼若

虔州城南崆峒山青濛點點蟠螺鬟虔州城北章貢水
烟波渺渺愁彼美山高水深道阻長懷人不寐淚沾裳
牀前霜月思誰見天外歸鴻字幾行憶我此監鹽酒務
重圍堠火連朝暮戰鼓雷鳴白鷺洲羽書風捲芙蓉渡

紛紛將吏心計窮得失孤城呼吸中中丞匹馬開江路
方州十部披春風偶觀水嬉到江汜割鮮行炙到牙齒
座上爭誇櫟里侯衆中獨識佳公子歸路因談夙昔心
宵將郢雪許知音一燈風雨敲詩細兩月琴尊惜別深
共畏亂離商去住一江寒雪余先去此際分携倍黯然
把酒低頭訝無語只今爲別半年餘羅滕葦桃又歲除
書去書來言不盡人南人北恨何如近聞中丞掃欃毒
君才往往耽箋牘疏上監門 帝曰俞軍中露布人傳
讀如此才華名未成那堪頓笑與人爭不恥短衣隨獵
馬每因長袖惜繁纓老儒偃蹇爲郎久敝褐緇塵牛馬
走怪我遭逢笑我遇愛君文章與君厚噫嘻佟生兮人
生何必才上林長揚安在哉夜鬼哭殘蒼頡字馬矢高
於昭王臺不如黃金白璧走燕趙高牙大纛衣錦回

游秦日記詩

余年弱冠名玷禁林拙宦長安忽經十載思江
南之桂樹乏隴上之梅花腸已九迴憂深百折
今秋奉 命典試三秦回首鄉園傷心益切朝
辭楓陛便深王粲之思晚渡桑乾忽憶閬仙之
句口占題壁以展幽懷時壬子閏七月初六日
一辭鄉國客幽燕不渡桑乾已十年自快此行歸計得
那堪馬首向秦川

閏七夕次涿鹿時大雨初晴遠山如洗樹色蒼

翠欲滴索筆賦此

遠樹垂垂合秋山澹澹烟心懸南國信腸斷北門篇重
乞天孫巧初逢地主賢還疑歸路便不覺馬蹄前

初九日次保定贈郡守沈國望

長安風雨夕冰雪照心胸每憶當年別誰知此地逢各
驚新髮髮難訴舊萍踪莫訝休文瘦由來上谷衝

鎖鑰三關峻嚴城百雉方清風銷簿領膏雨足農桑樓

聳橫山翠

府治有橫翠樓

亭幽接水光

有臨漪亭臨鷄水上

應知漢宣詔

雅意重循良

十一日次新樂縣和陸吳洲壁間韻

燕趙中分驛路偏垂楊夾道雜人烟地雄河朔平沙淨
水繞嚴城衆壑連秦塞一鞭秋色裏江山數夢白雲邊

自慚詞賦非時調轉憶機雲入洛年

十二日次真定府

大道無人空落花戴星日日促鋒車路傍古蹟傳黃石
有黃石遺蹟坊城外溪流走白沙拔幟漫勞趨趙壁抱薪終不

負官家

華山淮陰拔幟處蕪葦亭亦在焉

可憐百戰銷兵後惟有青山

帶晚霞

是日過漳沱河即光武危渡

鉅鹿城南水君王百戰過王衣雲慘澹赤伏讖蹉跎一
綫千山隔分流三晉多只今全盛日秋漲不生波

十三日次獲鹿縣有抱犢山

四望輕雲合平疇野雀飛萬山青欲滴千樹綠成圍俠
氣排秦去忠魂抱犢歸此行看不厭信馬弔殘暉

過平原君墓

但博賢豪公子名不聞
壁者似侯嬴他年王翦攻圍急
可是佳人一笑傾

井陘道中

入山心目豁萬慮靜無營
蒼翠侵衣冷幽香沁骨清
望中烟霧靄到處夕陽明
自愛探名勝何須計客程
紛紛下井陘歷歷亂離經
箭鏃黃沙蝕山泉戰血腥
孤峰疑斧削千嶂若雲停
自昔爭天險誰看萬古青

十四日由井陘渡河次栢井驛

平明問渡別孤城一逕蒼然信馬行
亂石成堆看似錦野花開遍不知名
兩行山脚稜稜出百尺雲屏面面迎
忽聽鄉音隨地改白頭關吏說西京

出固關和王阮亭韻

徑轉沙迴只此山陰晴倏換白雲間
回頭欲與恒州別一路題詩出固關

墨蹟淋漓白練裙
王郎時譽自紛紛
我家阿大風流甚

亦有詩名天下聞

原詩有憶家子吉句

十五日由栢井至平定州遇雨

四野雞聲欲曙天
山雲帶雨作寒烟
并州西去看秋色
不起歸思亦黯然

十六日曉行是日抵壽陽縣

冷露蒼涼點客衣前山斜月影輝輝參差紅樹窺明鏡
高下黃雲失翠微遠寺一燈清磬杳孤城殘角亂鳥飛
傷心從未經行地漫說相如乘傳歸

偶成

山驛荒荒月色低碧紗窗外野烏啼閨中北望長安信
不道長安却在西

十七日榆次道中雨

濕雲暝樹失西東寒雨絲絲逐曉風此際斷腸誰得見
一鞭秋色亂山中

路出榆關西復西荒原白草鷓鴣啼天陰百里行人絕
唯有秋風送馬蹄

十八日次平遙縣和王阮亭使院小飲詩

飲中我意欲成仙却恨題詩只一篇能醉此間桑落酒
郎中不愧李青蓮

十九日至張蘭鎮酌酒題壁

明月清砧夕寒衣塞上心如何劉白隋故遣客長吟

二十日次介休縣縣有介之推禁火臺郭林宗墓

策馬帶疎星崎嶇足未經水環三郡碧城對數峰青寒
食空烟火豐碑蝕墓銘冷泉關下過秋色正冷冷
林宗道墓蔡邕文潞國功名絕域聞祠廟只今同不朽

門橫金鎖對斜曛

二十一日過韓侯嶺嶺峻險甚有韓侯廟俯視石上苔蘚斑剝五色炫目而返照入溪不啻一幅明光錦也

一上韓侯嶺征軫俯落霞空山無鳥雀土穴住人家石壁層翻錦秋風慘不花王孫歸已晚惟見夕陽斜

二十二日次靈石縣縣有紅拂結義祠此事不見正史想土人沿稗乘所載也又一坊題英雄奇遇處五字亦傳藥師事

侯門如市氣如山戚里平臺自往還不是越公猶賤士隣亦只合讓紅顏

二十三日過國士橋

斬衣心不死一劍慰忠魂嘆息此橋上誰人國士恩

亭午過洪洞縣和王阮亭韵是日次平陽府宿叔向曾封邑高低郭外田雲橫三晉樹澗落萬山泉似勝江南景全銷塞上烟遲迴過晝漏飽看不須錢

二十四日次侯馬驛二十五日次聞喜縣裴晉公故里在焉湖園基址不可復識矣又有郭璞讀書處一小碑二十六日次猗氏縣二十七日次蒲州到時抵暮不得謁堯廟為憾二十八日渡河抵潼關少憩時料理入關事無暇及詩且性不耐輿偶拈數律皆從馬背上得之自平陽

至潼關以近陝界不復騎故詩亦中輟八月初一日由華陰至華州宿華陰爲楊太尉故里華州爲郭汾陽故里如四知坊及黃雀啣環處希夷墮驢名勝頗多惜在輿中索句不得

初二日亭午次渭南縣即香山故里也閱縣志見白香山詩賦此

清渭深深漢峙閒晨光野色有無閒東連少華雲烟合西望新豐草木刪釣叟何年跡尚父詩人此地白香山聞砧更起無窮思一夕秋風兩鬢斑

初三日次臨潼縣驪山在望避嫌不敢登需之撤棘可也初四日抵西安府初六日入關是夜力戒多飲題壁自警

槐花落盡桂花開誰是長卿作賦才回首十年辛苦地不將豪興付深杯

自後閣筆甚久至九月十九日同汪念弘聯轡出郭門時積雨初晴涉漉及灞水過馬腹抵暮至臨潼二十日早登驪山及東西繡嶺遊驪山老母廟邑令陳白石楚材也能詩携酒果同遊隨憇隨酌其山蒼秀峭拔飛巘瀑布應接不暇至夕陽在山暝磬催歸乃由西繡嶺下浴溫泉泉清潔可鑑深廣特冠他泉浴已訪華清宮長生殿舊址讀諸名人碑記略盡始就席詩以記

之并贈白石

冷然身在翠微中却望晴嵐二華通草樹尚餘唐繡嶺
人烟何處漢新豐借看殘碣尋佳句閒訪山僧識故宮
浴罷長湯春自滿不知簾外有秋風
憶昔宣城記勝遊謝公誰似此風流武昌魚膾供山楨
孔雀松枝當酒籌山有孔雀松詩通初唐才更富目空一顧
鑑懸秋從今別後思玄度只望關西百尺樓

驪山有烽火臺即幽王舉烽處也山下溫泉相

傳昉於秦始皇唐太宗頗植草樹建宮殿為游

幸之地玄宗因泉建華清宮長生殿十部梨園

集於繡嶺時與太真同浴其籛華勝事可聞不

可見今華清諸宮已作道觀而梨園亦鞠為茂

草矣獨溫泉泱泱遊其地者尚沐恩波於千載

之下而迂拙書生題詩滿壁皆痛罵太真為禍

水夫太真誠禍水然玄宗不賜洗兒之錢不受

范陽之節太真能禍唐耶而况開元全盛日侍

從應制之詩皆出燕許名臣手筆彼豈智出迂

儒下而自甘諛佞耶假令地無溫泉唐無妃子

至今未易姓乎立成八絕一洗塵腐非欲翻不

刊之案實以擴觀史之識耳

水殿芙蓉石上生長湯十六繞華清玉環死後鑾輿返
不信離宮有梵聲

試浴携來第一人六宮難望屬車塵當年應制推燕許
却笑書生罵太真

漫說驪山是禍胎月明曾按羽衣來真成亡國應無恨
况是西巡玉輦迴

長生殿裏訂重生贏得宮人掩淚聽劍閣陰雲真悔恨
張徽不譜雨淋鈴

太平曲譜盛梨園都是開元才子翻當日海青非伏劍
至今樂部亦含冤

上皇恩寵徧千官不獨楊家可結歡幸蜀匆匆無侍從
隴山鸚鵡問平安

軍士誰人李郭才譁聲動地佛堂開後來節度橫行甚
應是紛紛效馬嵬

不是佳人欲召兵無端烽火自傾城試看紅荔西宮入
一笑何曾失二京

十月十六日由朝邑署同馬玉坡冒雪策馬渡
渭水午餘至華陰止西嶽廟

披襟含雪意薄酒定朝寒騎馬風開鬣方舟纜渡灘樹
迎官道立山礙白雲盤日暮棲金宇仙壇仰面看

前殿一大額顏曰白帝宮余具牲醴陳廡下瞻
拜訖周視殿宇規制宏麗與宮闕等惜羽人俗

甚廊廡階除皆布粟麥燕雀往來飛掠可憎故
未及之

髣髴芙蓉閣蒼涼白帝宮漢唐餘玉簡檜栢老金風香
散烟雲外神清拜舞中羽人憐燕雀臺砌晒菽紅

萬壽閣閣三層高可四百尺明神宗建中列明
祖夢遊華嶽記屏并圖朱碧燦爛左右轉輪殿
藏所賜道經也

高閣盤迴上龍蛇畫棟新層簷爭二華一顧小三秦雪
色明宸翰玄言付轉輪藥師無賴甚何似夢遊人

是夜酒酣月白不能寐同玉坡作清夜遊庭有
巨石高三十餘尺云是秦碑視無李篆又一枯
樹蒼古堅黑如鐵旁有一碑述此樹爲老子青
牛所化玉坡詩敏甚真畏友也

雪霽月尤明清游恰二更秦碑無一字老樹說重生霜
草畱人跡松風咽鴈聲近慚梁苑客酒醒即詩成

十七日至雲臺觀觀在華山下去里許即白谷
考縣志云華岳山高谷空風甚緊非爲屏其口
縣城當之矣因建是觀

不識雲臺觀垂鞭信馬蹄殿門當白谷仙掌出青霓獨
受山風冷全遮縣郭低玉泉看漸近此地即丹梯

少選登山未一里有石廣袤十餘丈鑿雲根二
字筆法遒勁由此漸上則身在萬山中不見有
地安知有城市耶張超谷爲超結廬處每跨蹇
驢入市晚即攜壺荷鍾帶酒而歸今石室皆爲

亂石矣澗水激泓如練土人資以灌溉

扶筇來谷口積雪抱雲根勢逼陰崖坼山圍霧氣昏壺觴虛石室溪水識孤村興到與神會含情無一言

希夷峽為圖南高卧處奇峰百丈劃然中開如線中有龍泉泉清且醴周遭石壁千仞巖鑿名人題字深可二寸許大亦二三丈如中天積翠孤雲野鶴等字積雪填嵌宛如飛白至洞玄石室皆大布大篆真奇觀也

路轉希夷峽龍泉百丈懸天心開一線雲卧醒千年舞雪成飛白游仙想洞玄捫蘿忘足繭吾意自翩翩

行十里至娑羅坪坪以娑羅樹得名今樹已槁猶珍護弗衰也令具酒脯酌已羽人出筆索詩到坪宜小憇御道隔烟霞琥珀今朝酒娑羅舊日花雲先生竹几山勢觸窗紗誰有驚人句能書羽士家

由坪而上不可以輿步三里至小上方有亭亭在絕壁即玉皇洞也壁如削垂鐵鎖數十丈石上許步鑿罅受趾欲登者援之而上上即水簾洞壁刻鴻濛二字

石湧孤亭出如看海市樓人行鐵鎖上簾捲玉池頭浩劫諸天寂鴻濛一壁收雲山時換眼疑向夢中遊五六里至青柯坪坪在十八盤上有青柯公署故名回顧向所登最高處又平麓矣絕頂猿猱

仰視如豆緣崖趨壁如怖人者昔漢武帝登嶽
見衛叔卿雲車白鹿從天而降志都載之子未
敢信思賈勇再上而夕陽積雪如拒予者悵惘
而下至今忽忽若有所失也

十里青柯署回看大麓平歸樵隨木葉山狄畏人聲好
事張公子荒唐衛叔卿蓮花殘雪裏悵望隔蓬瀛

十一月初四日次懷慶府憶汪念弘留洛陽比
時念弘候豫撫代 題病假歸省也

同乘使傳客天涯獨我踈狂不憶家君在洛陽何所事
好將病眼自看花

晚行

四野天垂絕大河平沙漠漠舊朝歌當年禾黍今衰草
猶有行人向晚過

初八日次衛輝府遇王阮亭從蜀中歸出家書
見寄

相逢驛舍共停車說向三巴萬里餘我望白雲雙淚落
不堪爲爾寄家書

初九日謁比干廟見 宣聖殷比干墓四字真
蹟廟後即比干墓墓高大如阜繚以短垣不生
草木古蹟亦奇蹟也

殷社雖墟廟尚新尼山片石許知音書生諫草傳青史
不及當時一寸心

死諫非要身後名剖心未足謝扶傾千秋墓上畱長恨
日淡雲愁草不生

初十日次宜溝驛古沫鄉也王坡出懷古詩示
余云傾城傾國信蛾眉身着珠襦悔已遲識得
鷹揚蒙面意五湖端不載西施余曰紂之無道
不止寵妲已一事觀其鹿臺鉅橋酒池肉林無
非剝民自奉迨旄鉞一臨乃衣珠玉自焚無一
語及妲已者則紂特贖貨耳安知好色哉况實
始翦商詩已明言太王時事至太公蒙面斬妲
已一語出世說正史不載隨高頰引之以殺麗
華耳因和是絕

獨夫意自憐珠玉亡國名歸一婦人識得翦商非此日
苧蘿不是越功臣

十一日次湯陰謁鄂王廟廟爲岳忠武王故宅
余瞻拜太息久之恭賦二律畱題廟壁并寄王

裔孫某

天意終亡宋公生與檜逢有心歸二帝無計悟高宗蓮
幕陰持議龍沙自舉烽功灰三字裏碧血淬芙蓉
百戰英雄骨東窗笑語中繡旗恩未斷丸蠟間先通鐵
像行人磔王封史筆公我來瞻廟貌雪涕拜孤忠

距湯陰十里許夾道雜植柳柳高大相等衢亦
修廣如矢如砥顏曰柳廊遙想含青垂綠時佳

景當不減大堤曲所云也惜匆匆冰雪中經此
恨事恨事

引折汴河流向北柳廊應得勝隨堤可憐匹馬衝霜度
不及春風鶯燕啼

十二日至彰德府使院西偏一小亭曰天琴亭
可方丈偶一撫掌聲出墻壁棟宇間宛然絲桐
也此雖人工然能令人不可解謂之天籟也亦
宜

鍾期一去失知音何必宮商指上尋試向虛亭閒撫掌
想曾擲碎拾遺琴

十三日漳河懷古

漳河風起簇冰花落照寒原一片沙斷岬舟橫喧水石
危橋草束卧龍蛇故營銅雀誇新室實恨民心憶漢家
遺令淒涼空大計行人莫嘆舊繁華

銅雀臺懷古

北風蕭蕭捲蓬蒿平沙漠漠狐兔驕漳河悠悠冰乍合
鄴城荒荒犬夜號我來鄴城良踽踽蒼茫獨立向誰語
歌馬吟尋銅雀臺行人指點蟠龍柱蟠龍柱矗白雲隈
武帝何曾化鶴來每箇芙蓉巢烏雀千年鱗甲生蒼苔
蒼苔日厚吹聲歇宮女如花心斷絕誰開總帳望西陵
老入晉宮泣秋月秋月涓涓秋水清離宮疑塚一時平
耕夫拾得銅雀瓦還助詩人弔古情

十五日次邯鄲縣縣為藺相如故里有迴車巷
距城二十里外有盧生祠事出稗史無稽或方
外借此提醒世魔耳是晚邑令館余於荒店深
深使院已為楚王夢遊處矣故并及之

對酒愁來病自知步檐踏月苦吟詩尋思白晷歸無計
說到黃梁夢亦宜公子獨憐朱邸客羽林豪挾趙王姬
回車一睡仙人枕茅店寒灰曉未炊

二十二日重過新樂縣仍和前韻

百里征途日未偏馬頭遙羨萬家烟殷勤花月虛金諾
辛苦驂騾鐵連劍氣俠存詩句裏角聲悲語枕函邊
重來旅夢如相識憶別長安又半年

二十四日次方順橋和沈繹堂前輩壁間韻

作客經燕趙難逢劇孟家流塵遲日影枯木凍霜花冷
面迎風細孤燈待月斜應知茅店裏白雪讓青霞

二十七日次安肅縣寒甚

客夢杳江村歸程數薊門一身經萬劫隨處戀孤樽風
日寒相薄鬚眉氣欲吞何如携稚子煨芋待黃昏

三十日風阻長新店作家郵寄慰口占

片刻風沙幻踟躕半日閒寄書絨血淚真到鳳凰山
計諸體共六十八首其率爾題壁者俱不錄或
身經名勝以俗事未暇屬草者思欲補作然涉
歷已過情景不真雖多奚益故僅存此冊所載

不敢自計工拙聊計勿虛此遊云爾

二十日風山又雨吾於家海濱揚口古
日寒時甚得餘味冷香附吹林林于熟于竹黃
谷楚香玉林樹影綠隨門一良語真佳韻致
二十日夕受蕭蕭寒甚
而望風吟孤燈於月餘風吹來香氣白雲點青霜
亦容吟詩故懷歎歎不勝歎歎口燥林木東隱於

葉忠節公遺稿卷八

葉忠節公遺稿卷九 詩類

男芳輯錄

送錢越江南歸

鶯花共憶故園春客裏分携倍愴神
路出去年同宿處馬催芳草獨歸人
上林已獻猶懷璞舞袖雖長又積薪
且候江鄉桂花發好隨明月上秋旻

呈謝吳大宗伯四首 有序

歲次戊午節屆中和 天子御甲乙之帳敷金
玉之音博訪儒臣用襄文治並宣宰執得共明
揚於是我大宗伯吳公少宗伯楊公不以 映樞
為不肖公疏微名擬陳 當宁 樞聞命震驚疾

馳敬謝三返獲允寸心始安嗟乎一官落拓揚
雄每歎其窮再命偃僕孔子欲持其滿雖吾牛
多幸得出狄公之門乃小子何知敢謝李君之
御憶自殿頭三唱曾上瀛洲迨後仗下一麾便
淹蘭省目斷枝頭靈鵲怪底重棲傷心去後桃
花笑伊前度况乎賦慚五色史之三長學不前
人年隨流水設問建章宮千門萬戶畫地何以
成圖倘校秘書監四部五經刊訛不可勝數恐
有妨於薦鶚願自返於屠羊然而吾子謫仙曾
呼供奉此君小異獨識叅軍說項斯者誰人士
固伸於知已逢伯樂也何幸恩豈待於成身桃
柳春風記得捲簾之處參苓藥籠終為立雪之
甘泉人長者絕子乎誰能遣此先生教我矣何日忘
之矢報塞以有懷實感恩而欲泣短章見志謝
此日之品題長劍倚天異他年之拂拭

乙夜天書出禁中舉朝人得薦楊雄欲分四庫搜今古
直與諸家決異同四聖主好文丹穴近羣公交辟皂囊
空無才恐玷山濤啓甘老江東喚阿蒙

春風歸蹴燕泥香珍重珠簾捲畫堂夫子識原工相馬
小臣意自返屠羊齒牙餘論堪千古桃李公門亦一莊
肯把雙環讓黃雀銜來還貯舊巾箱

敢同嚴助厭承明九死圍城博一生夢裏松楸遊子淚

堂前菽水故園情
狂貪詩酒緣多病
貧不交遊失盛名
只讀父書三四卷
漫勞乞火到公卿
如公直道繫人思
一代斯文已在茲
手洗甲兵雲漢裏
身勤吐握太平時
科名原忝門生後
涕淚真因知己垂
辜負品題雖自棄
百年終感魏無知

呈楊少宗伯四首

詔傳天上網羣英
夾袋先疏賤子名
博豈張華堪顧問
歡如羊陟慰平生
走書從索菰蘆草
癖性真虛長者情
猶幸社前歸未得
傍公門戶好飛鳴

甘泉羽獵賦新詩
猶憶當年侍從時
可歎竭來牛馬走
那堪重到鳳皇池
衰親白髮倚閭倦
荒隴蒼苔復土遲
敬謝丈人非得已
一雙青眼寸心知

高山流水幾知音
千載風期想玉琴
奏賦長揚天子德
留賓東閣大臣心
遠慙武庫才原少
獨識叅軍恩更深
若說逃名甘自棄
十年前已合投簪

落落從無掃相門
故應憐我自孤根
馮唐白首誰知己
毛遂傷心但自言
千里燕終棲大廈
一株桃得傍名園
沉吟擬副梁公薦
不獨心銜國士恩

亂後歸金陵重晤金長真

與君言別後猶記
醉翁亭詩卷心常
憶兵戈日未經蠻
烟隨地黑人眼看
誰青辛苦重相見
應憐兩鬢星
到此真如夢相看
更黯然峰青重入
目頭白舊忘年鵬

鶚遲君健風塵倦自憐乍逢今又別雲外望江天

壽進士范莞公母夫人

清宵孤月照鳴繅玉燕初投別鶴號回首縞衣懷繡祿
那知白髮見宮袍閨中母獨丸熊膽池上人爭譽鳳毛
襖飲乍過萱草綠錦堂晝燭宴蒲萄

鏡臺塵厚舞鸞空成立孤雛淚眼中親檢殘編催午夜
教憑手澤認先公冰霜飽歷松逾翠雨露新沾花正紅
六十童顏五色詔一雙綵袖引春風

酬杜讓水孔目

武庫真堪作史臣編摩歲月綵毫新甘為李杜專門學
恥說機雲同郡人野耐勸君偏苦口嗔魚食我不批鱗
故園風味天涯得莫指雕盤羨八珍

戊午春暮同錢陶雲員外恭送

孝昭皇后梓宮宿豐贍村劉氏莊二首

淒然龍輜別椒房一代坤儀萬國傷路哭殷雷天亦淚
陌錢飛蝶草如霜 皇英地下悲相許 堯舜宮中夢
斷腸祠祝小臣隨挽紼素車白馬宿荒庄

堯舜 皇太后也

皇英謂 孝昭二后

青山如畫抱孤村水漲桃花直到門綠水千畦沾雨露
白頭五代見兒孫鬱葱時望昭陵樹湯沐應推故劍恩
真羨田家多樂事一宵鄉夢合銷魂

戊午春宋牧仲偕諸君子遊祖氏園亭賦詩見示

蘇東坡詩集卷之四
四
余不見與因憶丙午舊遊次和八首

十年花信匆匆過見說南園憶舊遊記得故人聯袂去
一觴一詠亦風流

十里芳塵馬足經兩堤烟柳接山青入門苔路盤紆細
行盡迴廊是水亭

湘竹屏風紅板橋一池春水映花嬌踏青人過驚沙鳥
隔岸香來翠袖招

畫簾開處水雲涵花氣侵人酒易酣好景滿前應得句
不煩重唱舊江南

爲愛山林肯賣書少陵遊興較何如城邊一步南塘路
自悔尋春蠟屐疎

敲詩醜酒在高臺曾與名園訂後回一樹桃花三尺水
都因怪我不重來

誤人遊屐恨無端回首當年強自寬新種好花君得見
幾株老樹我曾看

况是春遊不厭賒此時多有未開花藥欄紅吐茶蘼放
料得相逢在酒家

酌酒與馬王坡

依然話舊帝城春相視相驚鬢髮新回憶六年風雨夜
同經萬里亂離身沅湘賦就文憎命祠祝官閒性愛貧
莫咲浮沉甘吏隱只今不敢羨山人

且傾斗酒莫論詩今日真如夢醒時客裏見聞堪換聽

亂中歲月較常遲君辭刺史爭身後我揖將軍笑數奇
華頂白雲無恙否兩人冰雪久相期

次韻李容齋學士詔舉文學四首

八紘珊網敞清虛全盛才名古不如
詔兼收詞賦客誰人獨讓治安書
烽銷島嶼投戈後夢別江湖勸駕初
龍口曲通西太液雨餘花蕊出長渠

廟院紛然誚主司故應纁幣起鴻辭
清時大雅真堪作小輩單詞安足爲
牧豕孫弘需更選輸邊卜式悔高貲
箕山此夜空明月松桂新香滿鳳池

比戶爭彈貢禹冠圖南鵬翮到何難
一時名士風流盛千古君王禮數寬
應念蒼生資坐論豈捩白首博吟安
東山事業高江左不獨清談競舌端

太平郊藪鳳麟遊枉致千金駿骨求
不復傅王憐賈董忍將洗耳責巢由
三公吐握同聲薦兩漢文章一代收
兵氣漸銷羗笛裏樓頭思婦薄封侯

五日集金魚池

時從江右圍城中間道入都

客心爭良辰芳讌卜清晝深樹含涼風
方塘迴碧溜鬢花露葢鮮蘭根土香瘦
亂離所見花入眼如故舊回首異河山
撫懷驚節候茲偕勝侶遊盤格忘粗陋
藉草傾蒲觴丹砂笑勾漏一擲唱卷波
十巡誇射覆掬水擾遊鱗腮鬢炫金繡
投餌荇藻開徘徊若避就魚知人樂無
吾從惠莊後談詭清興移酒渴晚汀漱
披襟連臂歌舛

續緣溪走肴核紛道旁酣呼雜老幼佩萱游女歸鞍馬
如輻輳釵符壓輕蟬朱索牽衫袖歌舞宣城隅啁啾和
猿狄長安矜繁華荆楚猶戰鬪杯酒醉左徒獨醒世所
詬慷慨誦離騷誰爲後來秀天涯詩酒懷芬芳同蘭臭
雙鬢不易青一醉塞機竇斜陽樹杪催弦月女牆逗歸
鞭拍西爽蒼然滿烟岫

雙槐行

長安火雲連炎荒熏灼炙手煎枯腸偶尋小園暫遊憩
陰陰夏木生清涼中有雙槐屹相向接葉交枝步步障
晻藹仍分偃蓋形屈盤亦得虬龍狀蒼然新翠臨亭臺
霜皮斑駁滋莓苔扶桑無權暑不到清蔭坐深風徐來
同人欣賞共相顧沉吟此槐尚孤露佳話空傳玉樹名
結根未入陳思賦我聞九陌連狹斜天街兩畔稱槐衙
下走珠輪上鸞鷲干霄翦鬱凌青霞又聞開寶尚書省
月明華露篩清影天風吹落絲竹聲一夜簪紳盡延領
爾生何不朝明堂乃忘榮悴棲東墻輪囷百尺竟誰見
何年自起爲棟梁雙槐黯然促雙黛枝翻葉飛綠陰碎
爲問睢陽建始中開花結實今奚在

夏日東主客李梅崖

海色浮羲輪光景赤於血大地同鬱蒸無如長安熱屋
壁爲熏爐焦灼流汗竭青蠅緣鼻端瓜果恣吮啜童子
不因人冷冷嚼冰雪李侯靜者心顧盼杳同列慷慨談

平生促膝難爲別，示我生徒文以意。定工拙，目無五色。
迷相視，笑奇絕。開樽坐濃陰，衆芳惟所擷。清談生涼風，
情至語激切。文章益我貧，世路忘曲折。與子神理親，敢
曰矜氣節。蘭根忌當門，蟬聲不在舌。窈窕花影移，冰蟾
玉壺徹。烟蘿媚澄潭，潭水甘以冽。氣共秋旻清，何爲傷
井渫。置身詩書林，俯仰足怡悅。長袖修蛾眉，豈爲吾輩
設。卷舒視孤雲，翛然謝塵轍。

喜雨

早豈乾封意，郊原百草黃。輕雷初隱隱，遠樹忽蒼蒼。舞
石將雛乳，披簑眩女粧。當窗飛瀑急，出岫斷雲翔。屋壁
除塵氣，軒楹覺雨香。點隨風勢落，溜與漏聲長。不辨雲
山色，都涵水鏡光。碧波澄太液，幽興濯滄浪。煙暝林花
重，神清枕簟涼。虛簷低燕雀，新漲沒鴛鴦。青入垂楊岫，
秋生薜荔牆。魚蝦喧小市，父老話前莊。握裏輕珠玉，天
邊下稻粱。我勞無抱甕，有歲足輸糧。作省眠耕犢，潮平
信野航。空濛陰潤物，隴隰漸含芳。堠火銷應盡，兵戈洗
欲藏。開顏看鶴埵，携杖課蠶桑。真得田家樂，幾將帝力
忘。湛恩歸造化，何以頌君王。

秋日書懷

暑亦有時退，涼隨一葉生。天空容鴈度，日瘦逼江清。河
漢千門影，關山萬里情。銜杯無可語，高詠答秋聲。
夜靜天如拭，含情擊素帷。迂踈慚早達，貧賤悟前非。杵

急蟲聲斷鳥驚樹葉飛甲兵猶未解思切老萊衣
口別蓴鱸味於今十五年書緘來往淚人病夏秋天暝
色催歸鳥溪聲憶釣船南飛憑一夢爛醉北窗眠
但得賣山費歸休及此時手還慈母線兒誦老夫詩月
砌眠花影風潭泛酒卮野心何所託秋浦狎鸕鷀

秋日即事

俯仰盡今古悲來不爲秋萬方同水旱羣盜自王侯月
落疑弓影晴雲結蜃樓何如蘇門士長嘯碧山頭
宦況竟如此欺人作美談無錢供退食借馬去朝參乞
帖書千紙春衣換一酣兒曹饑不慣亦解憶江南

王瑁湖太常寓齋小竹

籠月含烟數尺餘蕭疎點綴子猷居此君舊是君家愛
一翠當窗伴讀書

節疎篠直影橫斜不學柔條宿晚鴉吹徹九天看跨鳳
莫教插戶引羊車
慈姥移根翠色連數條寒玉一窗烟騷人賦就題僧壁
定有黃門寫碧鮮
荆揚篠簳貢難通矢石紛紛醉眼中若產東南堪作箭
不妨投筆便彎弓

宣房一閉盡淇園夢向羅浮未易言把酒對君真不俗
居然塵外綠筠軒
綠潤檀欒蔭小庭隔窗疑是翠雲屏好畱霜雪千尋榦

編史成時得汗青

酬主客李梅堙病中見憶二首

閉關何地不山岑門外車塵與霧深貧病幸逃名士目
迂踈偶合道人心畫梁秋燕起歸思露草寒蛩誰好音
記得舊題詩句說同官同命到如今
知憐同調絕憐余暫別俱嫌踪跡踈但向離騷尋藥草
錯看貨殖是除書艱深詞賦原無賴汗漫交遊定不如
六脉兩人都病懶那堪秋雨滴階除

宮詹蘓夫子挽詞十首

一夢依稀奠兩楹那堪泰岱竟頽傾從今立盡程門雪
無復尼山振鐸聲

秘笈微言續五經夜窗刪訂一燈青考亭正寢看遺跡
多是先生座右銘

乞歸綽有二疏風松菊柴門望眼中還正堂前星夜隕
更誰駉輅護青宮

史局初開盛典墳不應地下作修文蒼生絕望東山起
一哭荒郊空暮雲

漫漫長夜更無春漠漠窮泉獨問津若到孝陵朝玉座
應憐公是舊儒臣

劍履無聲鶴不還白雲黃葉掃秋山絳帷高捲秋雲散
遺挂淒然在壁間

荆花半夜舊庭前玉樹經霜淚泫然只有芸窗書帶草

青青猶鎖碧山烟

學易忘機與道深布衣蔬食了塵心一生清白畱青史

却笑牀頭有賜金

椒漿滴不到泉臺悵望秋空咏八哀天意未應仇吾道
好將雨露植三槐

玉棺從此下陰房燐火年年燒白楊余本康成門下士
一聲薤露淚千行

戊午七月乾清門引見

時奉
命視學三秦

蓮漏初停闕九重恪隨啓事覲天容珮聲人語當軒
靜殿瓦宮花浥露濃講幄幽風歌七月醮壇霖雨慰三
農從今日遠長安近得白應題落鴈峰

曉行

聞鐘相顧起起趁月光行寒露草頭重吟身馬上輕村
炊開宿火雞唱定殘更鄉國日漸遠秋風吹雁聲
風勢曉來緊前林曙色收樹翻巫峽浪塵捲大河流山
暝路難辨馬驚嘶不休冷然疎雨過又度一程秋

上谷道中

艱難淡泊稱平生鞍馬勞勞認舊程豈有才名堪世用
只將心力與天爭縱橫燕趙輪蹄跡遠近秦吳母子情
但去願逢書未燼莫言文筆可銷兵

伏城驛遇雪

歸鴉樹樹宿寒枝行客栖栖尚路岐未是灞橋驢背上

一天風雪早催詩

獲鹿道中望積雪二首

千仞陰崖凍雪乾不吹玉笛早梅寒山靈恐負西遊興
先放春花過客看
百里人烟斷續間斜陽積雪水潺湲興來欲借關仝筆
寫盡今朝劈斧山

己未人日醴泉令移尊夜話

相逢人日對辛盤猶有天涯故舊歡寒夜論詩窮正變
殘疆同宦惜艱難薄嘗春釀愁中醉每憶江南夢裡看
聞道北山猿鶴侶爭携彩筆向長安

夜雨論文二首

夕陰寒峭逼窗紗玉屑霏微靜不譁半世食仙揮麈尾
幾人談佛雨天花但畱舌在空千古焉用文之著百家
雖少庾公樓上月掀髯絕勝聽琵琶

濕雲擁樹影濛濛合榻挑燈辨異同莫惜齒牙冰鑑外
却霏珠玉雨聲中少年宣室誰前席學士金蓮羨後宮
明月碧簪晴翠迴再移講座話春風

邊城較射二首

亭障連城闕邊風吹雁翎弦開月影白箭落草痕青磨
盾人原少穿楊史不經寥寥射鵰手悵望幕南庭
榆楊遊俠子意氣萬夫雄臂健風鳴鏑心調月上弓高
低人眼裏勝負鼓聲中今日分圍處遙天斷塞鴻

延長孫令重建學宮告成余至瞻拜并作碑記因
賦贈

荒城斗大亂峰間
儒吏雍容翰墨嫻
芹藻暗香新壁水
鼓鐘重振舊尼山
民栖陶穴風猶古
鶴聽琴聲夢亦閑
清絕縣門當澗道
一雙鷓鴣自飛還

崇岡叱馭竟忘疲
瞻拜神清愜夢思
棟宇久頽離亂後
宮牆重見太平時
辛勤化蜀才輪爾
慷慨過秦論有誰
自愧老儒章句拙
曾無黃絹勒青碑

橋陵

大荒浮黃雲衆山失故黛
劃然川原開蒼翠出烟靄
居人爲余言橋陵在其內
下車拂征塵屏息顙再拜
古柏參青霄枝葉爲偃蓋
黃帝未仙時此樹乃先
在其餘二千株環陵而向背
陵廟與樹連雲氣時變隸
沮水流其中觸石響清籟
懷古有餘情瞻眺得大概
當年神聖興制作史具載
採銅首山巔鑄鼎荆山界
鼎成龍下迎其說近迂怪
左徹不能從抱弓致忠愛
鑿山葬衣冠廟祀崇百代
且戰且學仙漢武發深嘅
至今祈仙臺芳草尚曠藹
候神幸緱山採藥巡海外
封禪何紛紛徒爲公孫
賣余意帝至尊不仙亦何
害緬彼垂裳時今古所嘉
賴不死今有冢此言良大
快惟有柏長生風雨勿能
壞

乾陵

梁山北望暮雲黯
述聖豐碑字半淹
泉下何人堪控鶴

陵前何地可垂簾園荒石馬苔花飼夜冷珠襦草露沾
雙闕久爲狐兔窟一坏新上更誰添

野草黏天野火焚脂殘粉汗不堪聞金輪南面昭儀貴
白馬東來愛子分長夜漸回嬰母夢舊香還惹石榴裙
只今樵牧經過此掩耳羞稱武后墳

嗚咽泉

綏州夾園水大理而居文屏山屏其南循山而
西爲雕山故以雕陰名雕山之巔扶蘇冢在焉
時有白虹出塚中去塚不五里有泉曰嗚咽相
傳爲扶蘇自裁處泉流斷續餘哀怨聲名之嗚
咽甚稱己未夏余校士至綏公事畢州守于君

吳堡令李君邀余遊徘徊久之感慨係焉于李
二君屬余記而賦之余應之曰唯唯憶昌黎有
言凡物不得其所則嗚然嗚亦各異其或忠能
折檻穎不處囊獨排羣議抗論朝堂其爲嗚也
激昂其或才人扼腕思婦關情青衫雨淚紅袖
吞聲其爲嗚也淒清又或權佞嫉才忠良去國
憂讒畏譏吟騷賦鵬其爲嗚也哀感又或俠客
愁深孤軍援絕易水悲歌龍沙飲血其爲嗚也
悲切而茲泉不然如簷之溜如石之瀝無瀑布
之可懸無珠簾之可織荷承露而乍傾雨將歇
而猶滴水與石濡石爲水蝕噫嘻此其所以爲

嗚咽者歟聽之冷冷挹之熒熒若泣者之中哽
如歌者之不勝欲鳴不可不鳴不能噫嘻此其
所以爲嗚咽者歟方其初授軍麾含情未絕牽
衣請畱以止北轍於時可鳴也而不鳴洎乎祖
龍已死奸臣矯符真僞未辨上章理誣於義可
鳴也而不鳴即謂父不可違從容引訣一言而
死以殛讒孽於情可鳴也而不鳴而乃聞命銜
悲撫劍飲泣引經自裁流血成碧鬼嘯鶻啼風
雲變色寫怨臆於清泉激哀音於白石閱萬古
兮千秋恍聞聲而於邑噫嘻此其所以爲嗚咽
者歟乃爲之歌曰

雕山截冀州城南岡巒森秀紛烟嵐吁嗟忠孝俱葬此
公子扶蘇與蒙恬蒙恬墓道沙飛雪扶蘇冢旁泉嗚咽
塚上長虹白亘天峽裏泉聲暗流血泣諫阮儒難悟君
一麾北監長城軍沙邱片紙倉卒下掣劍呼天天不聞
公子旣死李斯裂子嬰誅高秦亦滅忠魂哀怨寫嗚湍
萬古悲腸猶百結泉流觸石聲淙淙千巘萬壑吹陰風
颯如寒雨滴梧葉惜如敗壁吟秋蟲碎佩叢鈴共悽切
珠凌斷澗自摧折欲哭不哭時吞聲如與三十萬人訣
我行聞此摧中腸長歌入雲思激昂棄絕父子菴忠孝
無道未有如始皇嗚呼阿房一炬清渭竭驪山銅泉泉
亦洩牧童失火燒其陵惟有此泉流不絕

曉發宜君由同官至池陽三首

十程荒草雨綿綿忽換晴山到目前嶺斷谿迴青不了
此間別有艷陽天

馬頭烟岫鬱蒼蒼曲澗平疇萬柳莊風過黯然驚客思
江南花草斷腸香

笑別山君金鎖關高低螺黛簇雲鬟從今好辨丹青筆
莫畫倪迂水墨山

白蓮花

鏡涵初日照芙蓉獨洗紅粧見靚容明月六郎披鶴氅
晴山玉女倚蓮峰風來水殿迴香遠露浥花房墜粉紅
莫笑孤根看淡泊冰霜歷歷淨心胸

方前輩同諸公子手談即事

雨歇萬山低招尋晚過溪開尊遲落月話舊憶燃藜奕
罷仍瓜葛愁深共鼓鼙不嫌五斗俗刻燭再分題

苦雨四首

日月杳何所淒然但雨聲曉窗猶夜色燈火當秋晴舊
井無人汲新魚繞砌生蒼茫如野渡只少釣舟橫

驚心看醉僻扶病坐垂堂硯澗常如礎衣熏獨耐香欲
行愁蠟屐暫卧數移床莫訝人踪杳空天少鴈行

千家亡四壁萬室竟同廬木末看飛鷺街頭學釣魚濕
風吹幕重沉霧動窗虛猶恐天河竭蛟龍失故居

一雨竟如此天心不可知市空薪米貴吏怒輓輸遲城

版憂終浸河聲或夜移悶懷同醉夢彷彿見堯時

寄蒲城尹李寅工

晚窗風雨作秋寒夢憶重山

山在城南

李叔翰九日輕陰誰

戲馬一聲清磬又棲鸞

漢王阜治蒲城有鸞集學宮雅奏擊磬鸞自飛舞

獨看

花影人如菊但酌巖泉味似蘭

縣有蘭泉

史局正修循吏傳

知君姓氏滿長安

六盤山積雪

萬里空濛氣黯然荒原盡處碧山懸芒鞋踏月寒無影
玉袂凌雲勢捫天上路輪蹄來有跡下方雞犬去何年
且須一醖澆寒色不學神仙學酒仙

摩雲嶺二首

一上不可止烟巒破杳冥大河衣帶白遠樹草痕青輕
舉疑無地空花時見星冷然御風善揮手謝山靈
盤紆高欲盡曲曲護烟蘿候吏雲根立軺車鳥道過險
從千仞下遠甚百程多足穩一回顧雲山相盪磨

重經渭南

貧緣生世結秦州舊句重看感昔遊山截大河仍北向
心隨清渭欲東流奇文未逐風烟燼巧宦知難筆墨求
殘雪夜窗期一醉但澆塊壘不澆愁

庚申夏至日起武威至張掖得詩六首

地截黃河到海西大荒亭障雜羗氏泉聲鬼哭愁人耳
石路魚鱗滑馬蹄但怯衣單忘夏至不知野曠覺天低

驚飈入幕吹沙起一片陰雲萬里迷

寒暑無端曆不經重裘五月拜邊庭草黃牧地牛羊夕

雲黑龍湫雨電腥羗女亦知羞跪拜道人何法咒雷霆

當年戰骨今塵土日落燐飛點點青

平沙漠漠石稜稜馬力全銷不耐乘瘦日黯疑霜夜月

停雲寒凍一天冰試看顏色山仍舊山即臘脂山若具舟航

水或勝地有弱水訪試不驗憑弔蒼茫詩思竭披衣還就讀書燈

雪嶺千尋積不消烟嵐萬里斷耕樵野田六月青稞熟

沙磧終年馬矢燒尺水褰裳人過海層冰慘土歲成橋

何緣笑語猶華俗舌帶南音韻易調土人以行潦為海又聲似江寧

一綫長邊隨日盡兩行列障盡星羅山無雪處皆紅土

水過蕃來有黑河并護車師開幕府擬城大宛聽饒歌

時平不用青驄馬彷彿籃輿栗里過

武帝功成吏守邊傷心天末是居延人家板屋風聲裡

思婦寒衣淚眼前目斷燕支愁見月槎浮銀漢渡經年

慚余不作征西將藥裏書囊信一鞭

贈黃郡丞憶溪二首

閩之侯官人先大夫曾宰此邑

東南舟楫共春江萬里西來話客窗雲路飛鳴看累百

卷中文字歎無雙青羗對月吹蘆管紅葉當階撲玉缸

漫說葡萄能醉客一生愁重酒難降

旅夢牽衣見我翁還憐長樂荔支紅桐鄉有吏思朱邑

司隸多情問孔融一月兩回經聚散三年同宦隔西東

葉忠賢公遺稿卷九
相看腰組皆投筆吾輩原無尺寸功

贈顏六展

涼州鎮
帥幕客

寸墨淋漓盾上磨檄書草罷製鏡歌六經家世緬囊舊
五嶽烟巒蠟屐過流寓偶然如杜甫將軍况復勝常何
與君傾蓋旋揮手數點青山隔大河

輓醴泉令吳虞升

歲歲春游到依依鄉土情隔窗聽舊雨殘夢感新鶯莫
惜官榮悴所嗟人死生旅魂悲獨返歸櫬傍誰行甃破
添長恨囊空悔好名不堪商去住漸覺少逢迎故署仍
吹角虛房但哭聲印朱遺牒黯塵榻斷琴橫花木鄰移
植圖書吏暗更一官辜百口九死坐荒城啼笑看人面
饑寒滯客程飛鳥何處下化鶴幾時鳴托鉢憐孤子題
詩慰九京舉杯澆宿草雙淚已盈盈

連雲棧道中八首

萬里春風聽杜鵑一生遺恨落花前小窗書帶爭袍綠
無那秦灰到處然

大散關頭怪石橫不因路險斷人行軟輿細馬爭先後
誰聽春林杜宇聲

斗絕危峰路七盤雞頭關口石噴岬巘花澗草春無限
人馬驚心不敢看

山根細路曲隨溪身上前峰後嶺低閣道三千三百級
當年何處着雲梯

迴合藤蘿若竹墻藥欄桃塢水田秧誰家偷仿新豐樣
復改他鄉作故鄉
瀑布雲巒百丈懸露桃風柳接村烟三秦萬里難容足
只有梁州是洞天
秀絕峰巒俯漢濱晴雲宜笑雨宜嘖文章漫說江山助
如此江山助幾人
先入關中得漢王陰謀燒絕信張良祇緣愛脫儒冠溺
從此辛夷不復香

壽奮威王將軍二十韻

彩筆雲臺冑烟篆渭 熊罴圖爭尺寸劍氣佩雌雄跳
盪千人廢橫行萬里 先登標赤幟轉鬪躍黃驄刃接
飛霜白戈揮落日紅單車摧蟻賊匹馬闢蠶叢波靜三
巴合烽銷六詔通江山仍秀拔草木漸青葱南顧因安
枕西來遂掛弓深林聞杜宇密蔭隱多融颯颯分樓雨
雍雍大樹風角巾歸舊第天意鑒孤忠羽檄還徵調丹
心誓始終據鞍思戮力振臂復從戎半壁金湯寄全家
血戰功將門生奉叔兵法授英公爵列諸侯上勳垂信
史中壯猷難與競元老更誰同仙骨期頤壽輕身矍鑠
翁嵩高今獻頌玉琰酌郢筒

奮威時
在蜀

樂城苦雨二首

烟霧迷離慘不晴山風吹雨積荒城青連屋壁苔痕厚
白接江潮鷺羽輕樵徑封雲容鹿卧釣船依岸看魚生

推窗笑指平階水可有文瀾洗甲兵

濕雲蒸暑晝冥冥浙瀝空簷似建瓴漢水南浮添漲綠
梁山西望失遙青新巢語燕嫌泥重深樹鳴鳩喚夢醒
應是此間通蜀道張徽還唱雨淋鈴

病宿文安驛大象寺二首

驛舍卑栖陋琳宮衆造華烏馴齋磬食鼠拱佛燈紗土
薄偶生樹泉清誰煮茶此方常苦旱何日雨天花
野寺憑荒麓山門占澗濱泉聲寒瀉月樹蔭遠招人貝
葉隨僧句藤床與佛親明朝病良已前路又緇塵

金鎖關觀泉感興二首

出山不相待赴壑如有爭噴雪飛還舞從風送不逆滌
洄剉石角迅激奪人聲車馬勞勞客誰知爾獨清

雄關鎖不住孤往向人間但共冰霜冷何曾晝夜閒派
分辭碧漢石礙趁沙灣欲與長江合安流到故山

贈役翎令雷之采二十韻

令工醫術
明地理

瘠土兵荒後年年竭澤漁人家鳥獸散城郭虎狼居天
意同民患循良奉詔除入門咨疾苦閉閣酌盈虛何處
求芻牧甘心盡拮据飢分汲尉粟早鑿白公渠寒到憂
襦袴春來計侍儲課蠶眠榭葉引水種杭畝聽審終顏
圯宮墻久灌墟經營誠矻矻堂廡見與與嘔血爲良吏
開襟讀異書學成醫國手識妙指南車味愛廉泉淡溫
從黍谷噓園蕪猶拔薤厨冷尚懸魚用一無賴尾餘三

華忠節公遺稿卷九
三
凜衣衲山川貪秀麗草木漸扶疎襁負遷新井村炊滿
故廬裴君真獨立傳聖更何如最績全輸爾儒冠覺誤
余愧無清德頌挾藻上金輿

輓家五兄芑園兼示姪瞻存

落月沉邊城霜鐘杵寒夕衝風雁失行悲鳴形影隻昨
烹雙鯉魚發視緘題白上書兄亡期下書嫠疾革曾不
數日間俱爲長往客讀終肝腸摧淚湧氣終逆吁嗟吾
兄今生平甫半百少壯期雲霄辛苦探墳籍十上不見
收數奇困縫掖小堂松桂香呬唔答泉石嫂氏陳謝才
椒柳艷巾幘釵脚摹八分迴文繡方尺幽棲有同心相
莊若賓席機紅圖史青此外徒四壁未嘗蔗後甘獨味

山頭藥以貧永其年彼蒼亦何惜梁孟相繼殂龍蛇信
茲厄孤雛瀝血心兩棺填空宅餓鼠窺芻筵蛛絲罨華
萐魂兮招不歸一片飛烟隔嗟吁汗漫遊廿載違族戚
諸兄零落盡羣從久離逖所存我兩人庶幾慰岑寂憶
從豫章歸墓田薦新麥與兄餽祭餘意氣共酣適舉杯
酬阮孚能着幾兩屐匆匆兩三言一旦成今昔開函見
家書已爲故人迹入夜雖夢君知非平生覲明年余歸
來荆花早狼籍坐無同輩人酒向新墳滴俯仰睇霄淵
晨昏逾跼躅吾兄長不歸從子皆同脈遺書在床頭
勉珍手澤嘔爾一寸心慰此九泉魄讀書無所成徒悲
竟何益爾父身後名翳惟小子責余悲不成文長號吐

肝膈和之以淚珠書之以素帛一爰秦雲飛悵望遙天
碧

凍雪

雪凍從鴉噪官閒睡起遲諱貧飢忍淚憶夢病裁詩醉
覺乾坤大衰憐兒女癡孤松青見骨零霰白垂絲身世
轅車局年華過鳥知寸心如木石羣從但耘耔門戶將
何寄游閒卜幾時霜鐘催樺燭殘夜有餘思

上靖逆侯張將軍三十韻

皇威於有赫塞土廓無垠地險需飛將天生屬聖君
玉璜垂釣得兵法圯橋聞米聚山川勢戈開虎豹群拓
弓聲霹靂占角動星雲朔雪三更入江風一炬焚昆明

俄鼎沸河隴忽水分灑血丹心壯投膠鐵騎欣所摧秋
籜掃立解亂絲紛直舉通身膽旋收百戰勲實封加萬
戶異數賚千緡元帥中書令通侯上將軍名高能折節
武偃好談文左傳耽成癖茶經味勝芸虛懷培小草遐
矚借微曛嗟余孤蓬轉頻年一硯耘賓僚非杜甫科第
愧劉蕡許吾衣冠謁煩公吐握勤敢誇交縞紵相與挹
蘭薰蓮幕推金玉雷尊話典墳贈林車馬厚說項齒牙
芬邠翼今如此醇醪安足云別來更歲籥想到似朝醺
自笑姑藏長真同大首贖曰歸栖薜荔何處覓衫裙國
士羞瓊報巴吟待郢斤倦禽飛杳杳遠夢夜慙慙汗簡
行將續凌烟望更殷祁連冰浙瀝太華氣氤氳獨倚防

身劍寒宵看紫雲

酬檢討李天生五十韻

猗歟古鎬京禮樂盛先進凌遲至暴秦詩書為灰燼漢
唐噓其餘往往富才俊大雅或中衰鐘鏞鬱遺韻我
皇啟聖明心傳接堯舜遂使邠岐郊斯道絕復振終南
草木蕃涇渭魚龍奮靈秀之所鍾仙李挺根潤讀書非
求名筮易謝悔吝孤清耿秋霜超忽杳神駿躬耕好時
田游學淮南郡矯矯離羣鶴不緇亦不磷天子竚席
珍入山採瑜瑾鶴書下頻陽強起資顧問鹿巾而褐衣
執經修拜覲爰咨璣衡圖推策置時閏載賡省耕詩屢
豐勞田峻宛然策天人欽哉抒忠蓋詔謂惟汝賢箬
筆侍清禁勝國紛簡編繫爾史臣任稽首退直廬思母
欲歸省泣陳烏哺私情切淚沾襟至尊雖憐才色養
無所靳驅車尋舊山薜蘿轉清蔭萊衣娛北堂啼笑宛
童戲嗟余吳下蒙君子不我擯長途回高軒郵亭屈華
朝相視各動容投契醉芳醞別後無停輪萬里自奔迅
河外遠於天朔風利如刃荒邱狎虎狼旅食換顏鬢歸
來滿屋愁黔婁誚余甚月昏花影沉寒入琴聲噤趨拜
壓泥塗盤餐沾餘餽吞言末由申垂涕不敢技病卧烏
雀喧飛雪已盈枕豁達襟抱開置身覺千仞文章通精
靈氣誼無遠近少長遊荆揚壯游揖秦晉作者人人殊
如君良足信而我懷好音三載不一瞬曷致象罔來探

君胸中蘊拙宦辭西陲栖貧老東汶行矣戀故交含辭
詎能訥君誠遭遇奇一官特發軔將母亦有懷置身亦
有分山川資出雲不徒尚孤峻菽粟戒棄餘未聞惡饋
賑况今書軌同朝野慶大順請歌卷阿篇光翊休明運

雪珠

玉女窗扉啓明璫落翠微明珠疑瑟瑟冷艷故霏霏亦
照梁王乘頗分趙后輝日南雙淚下華架九芒圍處處
探驪得人人解佩歸投淵應較少咏絮覺全非董偃知
難賣隨侯獲遇希不因川獻媚直是蚌能飛好去空山
卧無勞按劍威豐年兼此寶莫羨謝莊衣

別李天生五首

把君詩卷到更闌慷慨重歌行路難未免有情俱下淚
不堪言別况加餐慈烏好向春林哺越燕終思故壘安
明日斑駁穿柳過一雙青眼更誰看

憶辭建禮入秦關悽絕龍沙鳥道間穿棧百盤臨漢水
披裘六月過天山不知馬首行何託但着征衫破未還
試唱古來邊塞曲有誰聽罷獨開顏

萬里經行虎豹羣蕭然一杖逐孤雲山頭黃蘗畱餬口
榻上青氈賣犒軍差喜清貧全似爾獨慚詞賦不如君
此生若有王戎癖不待相逢硯已焚
秦火燒殘漢律吹西京文筆至今垂名山豈少藍田玉
衆咻難爲絳帳師吾道漸孤離別後此言莫負晦明時

知君鄉土情尤切亭外生徒樂問奇

東門追餞眼婆娑曲曲清歌喚奈何不躍不鳴甘待老

一丘一壑許誰過稻畦得隙兼蒔藥漁浦猶烟便著蓑

雨歇益生梅子熟知公商鼎待羹和

海里鯨魚計欲吞羣龍於一林豈亦雲山應黃藥

海里鯨魚計欲吞羣龍於一林豈亦雲山應黃藥

海里鯨魚計欲吞羣龍於一林豈亦雲山應黃藥

海里鯨魚計欲吞羣龍於一林豈亦雲山應黃藥

海里鯨魚計欲吞羣龍於一林豈亦雲山應黃藥

海里鯨魚計欲吞羣龍於一林豈亦雲山應黃藥

葉忠節公遺稿卷九

